

Trisha Bermudez:

“Anino”

Sa bawat buwang-liwayway,

May kagalakang gumagabay.

Sulyap, "Narito ako,"

Sa puso'y totoo.

Hindi tao, higit pa,

Damdami'y sumasaya.

Mata niya'y sapat,

Sa mundong tila salat.

Oras, salbahe't mabilis,

Huling hinga'y lumilis.

Hawak, luha'y umaagos,

Puso'y wasak, ngunit tapos.

Sakit ng pagkawala,

Naninikip pa rin sinta.

Boses sa hangin,

Nasa puso mo, damhin.

Mark Vincent Sagun:

“Umaga sa Kubo”

Sa pusod ng palayang tahimik pa’t gising,

Kumakaway ang hamog sa bawat tanim.

Malalamig na hangin, dumarampi’t banayad,

Sa lumang kubo’y tila yakap ng ulap.

Pagsilip ng araw sa dulo ng silangan,

Gintong liwanag ay dahan-dahang gumagapang.

Sa ibabaw ng mesa, may usok na kumakaway,

Aliwalas ng init, sa dibdib ay sumasayaw.

Hinahaplos ng singaw ang mukha kong gising,

Kasabay ng huni ng ibon sa dapit-hatinggabi.

Kaluskos ng palay, tila awit ng bukid,

Habang sinisimsim ko ang tahimik na init.

Dito, sa kubong yari sa kahoy at pawid,

Simpleng umaga’y puspos ng langit.

Ang bawat higop ay saglit na pahinga,

Sa mundong mahamog, may init na kasama.

Ethan Pabiona:

“Liwanag sa Kalawakan”

Sa dilim ng gabi, langit ay mistika,  
Mga liwanag ng bituin na kay ganda,  
Pag-asa'y abot ko, sa dako'y tumitig,  
May kapayapaan sa puso ang himig.

Kanilang liwanag, gabay sa 'king daan,  
Mundong masalimuot, payapa'y wala,  
Kislap ng tala ay kwentong isinaysay,  
Dala ang ningning sa aking mga kamay.

Sa bawat pagtanaw, tanong ay sumisibol,  
Anong hiwagang sa dilim ang habol?  
At sila'y saksi sa aking pagparito  
Kaya ang isipan ko'y walang siphayo

Sa ilalim nila, ako'y nag-iisa,  
Ngunit sa itaas, ramdam ko'y may saya,  
Dilim at lungkot, ako'y nakahimlay  
Liwanag nila, buhay ko'y naging tunay

Aivan De Guzman:

“Pag-Ibig, Digmaan, Lumbay”

Sa iyong paglisan,

Aking naramdaman

Ang lumbay at kalungkutan

Na dala ng natapos na digmaan...

Ako ay nasa laot,

Na nababalot ng lungkot

Nagsusulat ng liham,

Liham ng pamamaalam

Aking nabatid

Ang iyong mapait na karanasan

Sa digmaang ito,

Na pilit tayong pinaglayo

Sinilid ko sa bote

Ang pusong napipi

Kasama ng liham

Na 'di mo na mababasa muli.

Handa na akong iwan

Ang liham ng pamamaalam

Sa malawak na dagat at karagatan

Ng mga alaala mong naiwan

Ang tula na ito,

Ay magsisilbing alaala

Na minsa'y minahal kita

Sa gitna ng giyera't luha